

1 TIMOTEO

Pablo Timoteore oãdoredea

1 ¹Yu Pablo murê oãdoredea. Jesucristo, Marĩpu marĩrê peamegue waabonerãrê taugu dorederosũta yure pĩdi ããrĩmĩ ĩgũyare buedoregu. ĩgũrêta, ĩgũ marĩrê oãrô iriburire yũrã yãa. ²Mũ diayeta yu magũ irirosũ ããrĩgũ ããrã. Irasirigu murê ire gojãa. Marĩpu ããrĩnĩgũ, marĩ Opũ Jesucristo murê iritamũ, bopoñarĩ merã ĩã, siũñajãrĩ merã ããrĩrikũmakũ iriburo.

**Pablo ãrĩgatori merã
buerire pẽdorebiridea**

³Yu Macedonia nikũgue waagũ, murê Efesogue dujadorebũ, irore surãyeri ãrĩgatori merã buerãrê: “Iropãta bueka!” ãrĩ weredoregu. ⁴ĩgũsãrê: “Iripoegue marã ĩgũsã basi ĩgũsã gũñarĩ merã kere wereunadeare, musã ñekũsãmarã iririkũunadeare gũñanĩbirikõãka!” ãrĩ wereka! Marĩ irire gũñanĩrã, iri merã gãme guaseo, Marĩpu marĩrê iridorerire iribea. “Marĩpu yure iritamugukumi”, ãrĩ bũremurĩ merãta ĩgũ marĩrê dorerire irimasĩa.

⁵Marĩpu marĩrê: ñerĩrê opamerã, ĩgũ ĩũrõ waja opamerã ããrã, ãrĩ gũñarã, diaye Jesucristore bũremurã ããrĩmakũ gããmeme. Irasirigu õãrĩrê doremi. Marĩ irasũ ããrĩrã, ĩgũrê, gajerãdere oãrõ maĩrãkoa. ⁶Surãyeri irire tũyanemobema. Irasirirã gajĩ ubu ããrĩrĩrê gãme guaseoma. ⁷Marĩpu Moiserẽ doreri pĩdeare gajerãrê buerimasã ããrĩduakererã: “ĩ ãsũ ãrĩduaro yãa”, ãrĩ buekererã, ĩgũsã buerire pẽmasĩbema.

⁸Marĩ masĩa. Marĩpu Moiserẽ doreri pĩdeare diaye buemakũ õãgorãa. Marĩpu,

masakare iri dorerire tarinũgãrĩrê masĩdoregu, irire pĩdi ããrĩmĩ. ⁹Iri dorerire buerã, ire masĩrõ gããmea. Marĩpu iri dorerire pĩgu, diayema irirãrê diayema iridoregu meta pĩdi ããrĩmĩ. Iri dorerire irimerã gapũre irire pĩdi ããrĩmĩ, diayema gapũre masĩburo, ãrĩgũ. Iri dorerire tarinũgãrãrê, ñerãrê, ñerõ iririkũrãrê, ĩgũrê bũremumerãrê, ĩgũya buerire gããmemerãrê, ĩgũsã pagusãmarãrê wẽjẽrãrê, masakare wẽjẽbẽorãrê, ¹⁰nome merã ñerõ irirãrê, ãma merã ñerõ irirã nomerê, ãma seyaro ñerõ irirãrê, nome seyaro ñerõ irirãrê, masakare ñeã gajerãguere duarãrê, ãrĩgatorikũrãrê, ãrĩgatori merã: “Ãsũ irirãkoa”, ãrĩdeare irimerãnorê, ããrĩpererã õãrĩ buerire kãmutaduarãrê iri dorerire pĩdi ããrĩmĩ. ¹¹ĩ õãrĩ bueri, Marĩpu masakare tauri kerere wereri ããrã. Marĩpu õãtarigu yure ĩ kerere masakare weredoregu pĩdi ããrĩmĩ.

**Pablo, Marĩpu ĩgũrê bopoñarĩ
merã ĩãrĩrê gojadea**

¹²Yu marĩ Opũ Jesucristore usuyari sĩa. ĩgũ yure: “Oãrõ buegukumi”, ãrĩ gũñagũ ĩgũyarãrê iritamudoregu beyepĩdi ããrĩmĩ. Irasirigu ĩgũ turarire yure sidi ããrĩmĩ. ¹³Iro dupuyurogue yu Jesucristore ñerõ werenĩ, ĩgũrê bũremurãrê ñerõ iri: “ĩgũ õãbemi”, ãrĩnabũ. Yu ĩgũrê bũremubirisĩa, yu ñerõ iririre: “Ñerõ irigu irikoa”, ãrĩ gũñabirisĩa, irasiribũ. Irasirikerepũrũ, Marĩpu yure bopoñarĩ merã ĩãgũ, beyedi ããrĩmĩ. ¹⁴Marĩ Opũ yure bũro maĩgũ oãrõ irimi. ĩgũ yure Jesucristore bũremumakũ, gajerãdere maĩmakũ irimi. Marĩrê Jesucristo merã ĩgũrê bũremumakũ, gajerãdere maĩmakũ irimi.

¹⁵I yu wereburi diayeta aārā. Āārīpererā irire būremurō gāāmea. Jesucristo ñerō irirārē ĩgūsā ñerī iridea wajare taugu, i ũmũguere aaridi āārīmí. Yuta āārīpererā nemorō ñerō iritarinũgādi āārā. ¹⁶Yu irasũ āārīkerepũrũ, Marĩpu yũre bopoñarĩ merā ĩāmi. Irasirigu, Jesucristo yũre neō perebiri bopoñarĩrē masĩmakũ irimi. Gajerārē Jesucristore būremurārē ĩgũ yũre bopoñarōsũta ĩgũsādere bopoñarĩrē masĩmakũ irigũkumi. Pũrũ ĩgũsārē ĩgũ pũro perebiri okari opamakũ irigũkumi. ¹⁷Irasirirā Marĩpũre: “Ōātarigu, turatarigu āārā”, ārĩ, ũsuyari sĩnĩkōārā! ĩgũta marĩ Opũ āārĩnĩkōāgũkumi. ĩgũ neō boabirikumi. ĩgũ sugũta Marĩpu āārĩmi. Deyomarĩgũ, masĩtarigu āārĩmi. Irasũta āārĩmi.

¹⁸⁻¹⁹Timoteo, mũ yu magũ irirosũ āārā. Irasirigu yu mũrē: “Āsũ irika!” ārĩ werea. Iro dupuyuro Marĩpu marĩyarārē mũ iriburire mũrē weredoredĩ āārĩmi. Irasirigu, ĩgũsā mũrē: “Marĩpũyare ĩgũ turaro merā āsũ irigũkoa”, ārĩ werederosũta ĩgũrē būremurĩrē piriro marĩrō gũñaturari merā irika! “Marĩpu ĩũrō ñerō iridea waja opabea”, ārĩ, ōārō gũñagũ āārĩka! Surayeri: “Ñerĩrē iribirikōārō gāāmea”, ārĩ gũñakererā, ñerō irima. Irasirirā Jesũyare būremurĩrē poyanorēma. ²⁰I, Himeneorē, Alejandre irasũta waabu. Irasirigu ĩgũsā pērārē wātēa opũ Satanás ĩgũ gāāmerō iriburo, ārĩgũ, Jesũre būremurā merā āārĩnemodorebiribũ. Marĩpũre ñerō ārĩ werenĩnemobirikōāburo, ārĩgũ, irasiribũ.

Marĩpũre sērērā āsũ iriro gāāmea, ārĩ gojadea

2 ¹Mũsārē āsũ iridorepũroria. Āārĩpererāyā āārĩburire Marĩpũre sērēbosaka! ĩgũsārē ōārō iritamũ, bopoñarĩ merā ĩāburo, ārĩrā, ĩgũsārē sērēbosaka! ĩgũrē: “Mũ merā ũsuyāa”, ārĩka! ²Oparāyā āārĩburire, masakare dorerā āārĩpererāyā āārĩburidere Marĩpũre sērēbosaka, ōārō doreburo, ārĩrā! ĩgũsā ōārō doremakũ, gopepyari

merā Marĩpũre būremũ, ĩgũ gāāmerĩ direta iri, ōārō siũñajārĩ merā āārĩrikũrũkoa. ³Marĩ gajerāyā āārĩburire Marĩpũre sērēbosamakũ ōāgorāa. Irire marĩ irimakũ ĩāgũ, Marĩpu marĩrē taugu ũsuyari merā marĩrē ĩāmi. ⁴ĩgũta āārĩpererā masakare perebiri peamegue waabirimakũ gāāmeme. Diayema āārĩrdere masĩmakũ gāāmeme. ⁵ĩgũ sugũta Marĩpu āārĩmi. Jesucristo, Marĩpu merā marĩ masakare ōārō āārĩmakũ āmubosagu sugũta āārĩmi. ĩgũ marĩ irirosũ dupũkũgũ āārĩmi. ⁶ĩgũ curusague boari merā āārĩpererā masakare ĩgũsā ñerĩ iridea wajare wajaribosadi āārĩmi ĩgũsārē taugu. Irasirigu Marĩpu ĩgũ masakare irire masĩmakũ iriripoe ejamakũ, iri kerere wererārē weredoremi āārĩpererā masĩburo, ārĩgũ. ⁷Jesucristo judĩo masaka āārĩmerārē iri kerere weredoregũ, ĩgũsārē ĩgũrē būremurĩrē, ĩgũyama diaye āārĩrĩrē yũre buedoregũ pĩmi. Irire diayeta mũrē werea. Ārĩgatogũ meta yāa.

⁸Yu āārĩperero marā ũmarē guaro marĩrō, gāme guaseoro marĩrō Marĩpũyare ōārō irirārē mojorĩ soemu, Marĩpũre sērēmakũ gāāmea. ⁹Nomerē, ũma merā ñerō irirā nome sãñarōsũpero sãñabirimakũ gāāmea. Ōārō keoro ĩgũsārē ejari surĩre sãñaburo. Gajerā ĩgũsārē: “Ōārō deyoma”, ārĩ gũñamakũ iriduarā, ĩgũsāyā poañapure wũũapũwea nome āārĩduari direta gũñarikubirikōāburo. ĩgũsāyā dupũrdere oro merā, perla wāĩkũri yeri wajapari yeri merā iridea merā mamubirikōāburo. Wajapari surĩdere sãñabirikōāburo. ¹⁰Masaka ĩgũsārē: “Ōārā āārĩma”, ārĩ gũñaburo, ārĩrā, āsũ gapũ iriburo. Gajerā nome: “Marĩpũre būremua”, ārĩrā nome irirosũta ōārĩrē iriburo. ¹¹Jesũre būremurā nerērōgue nerērārē Marĩpũyare buerimasā buepũroere nome werenĩrō marĩrō būremurĩ merā pēburo. ¹²Mũsā nerērōgue nerēmakũ, nome ũmarē buebirikōāburo. ĩgũsārē dorebirikōāburo. Werenĩrō marĩrō buerimasā buerire pēburo. ¹³Āsũ

äärä. Maripu Adäre iripuroridi äärími. Puru Evare iridi äärími. ¹⁴Adán, wáti árigatosúdi meta äärídi äärími. Eva gapu wáti árigatoride buremusiá, Maripu dorerire tarinugáde äärímó. ¹⁵Irasú ääríkerepuru, igo purákudea merá“ Jesúre buremu, gajeräre maí, ñeró iribiri, diayema gapure iriráno tausurákuma.

Jesúre buremurá oparáyamaré gojadea

3 ¹I yu wereburi diayeta äärä. Sugu Jesúre buremurá opu ääríduagu, óarí moáriré iriduagu äärími. ²Irasiriduaguno ásu ääríbu. Masaka: “Ñeró irigu äärími”, árisúña marígá, sugoreta marápokugu, pémasíri merá iririkugu, diayemaré irigu, masaka buremusügü, ígüya wii gámeñajará ejaräre óaró bokatíríneägü, gajeräre óaró buegu ääríbu. ³Neó mejábi, gámekéáduabi, gajerá merá guaseobi, ñeró iriri merá niyeru wajataduabi ääríbu. Irasirirono irigu: masakare bopoñarí merá iritamugü, niyerure uaribejabi ääríbu. ⁴Ígüya wii maräre óaró doremasígü, ígü puräre buremurí merá ígüre óaró yujmakü irigu ääríbu. ⁵Ígüya wii maräre doremasíbi, Marípure buremurí bumaräre irota nemoró koremasíbirikumi. ⁶Sugu Jesúre buremurá opu ääríduagu maama buremunugägü ääríbirikóábu. Maama buremunugägü gajipoe irigu ígü: “Gajerá nemoró äärá yu”, ári gúñabokumi. Irasú ári gúñagü, wáti gúñaderosú gúñabokumi. Irasirigu Maripu wátré wajamoáderosú ígüre iribokumi. ⁷Irasirigu Jesúre buremurá opu ääríbu Jesúre buremumerá: “Óägü äärími”, árisúgü ääríbu. Ígü óaríre iribirimakü íará, ígüre ñeró wereníbokuma. Wáti ígüre ñerí iridorerire iribokumi.

Jesúre buremurá oparäre iritamuráyamaré gojadea

⁸Jesúre buremurá oparäre iritamuráde masaka buremusurá

ääríbu. Árigatori maríró wererá, mejámerá, ñeró iriri merá niyerure wajataduamerá ääríbu. ⁹Jesúya diayema ääríriré Maripu maríre ímudeare piriro maríró buremurá: “Maripu íüró waja opabea”, ári gúñará ääríbu. ¹⁰Ígüsáré sóoburi dupuyuro ígüsá äärírikurire óaró íábu. Puru ígüsá óaró äärírikurire íá odo: “Waja opabea”, ári, ígüsáré sóoburo. ¹¹Jesúre buremurá oparäre iritamurá nomede irasúta masaka buremusurá ääríbu. Gajeräre ñeró kere ári weremerá nome, pémasíri merá irirá nome, óaríre irinírá nome ääríbu. ¹²Sugu Jesúre buremurá oparäre iritamugü sugoreta marápokugu, ígü puräre, gajeräre ígüya wii maräre óaró doremasígü ääríbu. ¹³Jesúre buremurá oparäre iritamurá óaró iritamamakü íará, gajerá ígüsáré: “Óaró yáma”, árirákuma. Irasirirá güiro maríró gúyasíríri maríró gúñaturari merá ígüsá Jesucristore buremuríre gajeräre wererákuma.

Jesúyamaré gojadea

¹⁴⁻¹⁵Mata yu mu purogue waaduadáa. Waaduakeregu, gajipoe irigu waamasíbiribokoa. Irasirigu i pü merá mure: “Maripu purá ásu iriburo”, ári were gojá. Maripu purá Jesúre buremurí bumará Maripu okanígyará ääríma. Ígüsáta Marípuya diayemaré buremurá, gajeräre irire buerá ääríma. ¹⁶Marí: “I diayeta äärá”, ári masía. Marípuya diayema, marí dupuyuro masíbirídea, ígü maríre ímudea óataría. I ásu äärá:

Marípu magü marí irirosú dupukugu deyoadi äärími. Óägü deyomarígü: “Ígü diayema irigu äärími”, áriríre maríre masímakü iridi äärími.

Marípure wereboerá ígüre íañerá ääríma. Ígüyará ígüya kerere ääríperero maräre werenerá

^a 2.15 Génesis 3.15: Eva Maripu dorerire tarinugádeero puru, Maripu äärínígü píriré ásu áridi äärími: “Ígo nomeó mure íáduabirikumo. Dapagá merá igo parámerá ääríturiaráde mu parámerá ääríturiaräre íáduabirikuma. Mu, sugu igo parámerá ääríturiaguya gubure kúrimakü, ígü gapu muya dipurure karamutügukumi”, áridi äärími. Irasirigu Jesús, Eva purákudi parámerá ääríturiaguta, marí ígüre buremuräre taugu äärími.

āārīmá. Irasirirā i ūmūguere masaka ĩgūrē būremunerā āārīmá. Puru Marĩpu ūmugasigue ĩgūrē āīmūrīadi āārīmí.

**Pablo Timoteore Jesúre
būremudinerā ĩgūrē
būremuduúrāyamarē gojadea**

4 ¹Ōāgū deyomarĩgū ire pēmasĩma ōārō marĩrē weremi. I ūmu pereburi dupuyuro surāyeri masaka Jesúre būremudinerā ĩgūrē būremuduúrākuma. Wātēa ārĩgatorire, wātēaya buerire pētūyarākuma. ²Irigatorikurā irire buemakū pérā: “Ōārĩ bueri āārā”, ārĩ gūñarākuma. Ārĩgatori merā buekererā, ĩgūsā basi: “Nerō irirā yāa”, neō ārĩ gūñabiríkuma. ³Masakare: “Marāpokubirikōāka! I baarire baabirikōāka!” ārĩma. Marĩpu āārĩpereri marĩ baaburire iridi āārīmí. Irasirirā marĩ Jesúre būremurā diayemarē masĩrā, ĩgūrē: “Ōāa”, ārĩ, ūsuyari sĩ odo, baarire baamasĩa. ⁴Āārĩpereri Marĩpu iridea ōārĩ āārā. Irasirirā ĩgū irideare: “Gāāmebea”, ārĩbirikōārā! ĩgūrē: “Ōāa”, ārĩ, ūsuyari sĩ odo, baaro gāāmea. ⁵Marĩpu ĩgū irideare: “Ōāa”, ārĩ weresiadi āārīmí. Irasirirā marĩ baaburi dupuyuro ĩgūrē: “Ōāa”, ārĩ, ūsuyari sĩmakū, marĩ baarire ōārĩ waamakū yámi.

**Pablo Jesúre moāboeguyamarē
weredea**

⁶Mu, i yu weredeare Jesúre būremurārē buegu, Jesucristore ōārō moāboegu āārĩgukoa. Irasirigu Marĩpuya werenĩrĩ marĩ būremurĩrē, ĩgūyare ōārĩ buerire mu ōārō iritūyarire gūñaturari merā būremunemogukoa. ⁷Masaka i ūmumarē ĩgūsā basi ĩgūsā gūñarĩ merā kere wererire pēbirikōāka! Iri Marĩpuya āārĩbea. Marĩpu gāāmerĩ direta iritūyawāgānĩka! ⁸Marĩ ōārō moāpaumakū ōāgorāa. I nemorō Marĩpu gāāmerĩrē ōārō irimakū ōātaria. ĩgū gāāmerĩrē iripaurā, i ūmūguere marĩ ĩgū merā ōārō āārā. Puru ūmugasiguedere ĩgū merā āārĩrākoā. ⁹Iri yu wererĩ diayeta āārā. Āārĩpererā irire: “Diayeta

āārā”, ārĩ būremurō gāāmea. ¹⁰Irasirirā marĩ gajerārē Marĩpuyare buerā, ñerō tari, buro moāa. Marĩpu okanĩgū marĩrē ōārō iriburire ūsuyari merā yūsĩā, irasū yāa. ĩgū āārĩpererārē taugu āārĩmi. Jesúre būremurā direta taugukumi ĩgū puro āārĩburo, ārĩgū.

¹¹Jesúre būremurārē iri āārĩpereri yu ārĩrĩrē iridore, bueka! ¹²Gajerā, mu maamu āārĩmakū ĩārā, murē péduabiribokuma. Irasirigu, Jesúre būremurārē murē péburo, ārĩgū, ōārĩrē werenĩka! Ōārō irinĩka! Gajerārē maĩka! Jesúre būremutūyanĩkōāka! Marĩpu ĩūrō ñerĩ marĩgū āārĩka! Murē ĩākũiburo, ārĩgū, irasirika! ¹³Yu, mu purogue ejaburo dupuyuro Jesúre būremurā nerērārē Marĩpuyare gojadea purē bue ĩmuka! ĩgūsārē: “Āsū āārĩrikuka!” ārĩ wereka! Marĩpuyare ōārō bueka, ĩgūsā irire masĩnemoburo, ārĩgū! ¹⁴Iro dupuyuro Marĩpu Jesúre būremurā oparā murārē murē weredoredĩ āārĩmí. Irasirigu, ĩgūsāya mojorĩ merā murē ñapeomakū, ĩgū turarire sidi āārĩmí, ĩgū weredorederosũta mu ĩgūyare irimasĩburo, ārĩgū. Irasirigu, ĩgū murē irimasĩrĩ sĩrĩrē kātibirikōāka!

¹⁵Irire gūña, irinĩka, āārĩpererā mu Marĩpuyare irimasĩnemowāgārire ĩāburo, ārĩgū! ¹⁶“¿Ōārō irigu yārĩ?” ārĩ gūñagū, mu iririkũire, gajerārē mu buerire gūñaka! Ōārĩ direta irinĩka! Irasirirā mu, murē pénerāde tausũrākoā.

**Pablo Timoteore: “Jesúre
būremurārē āsū irika!” ārĩ gojadea**

5 ¹Murārē turibirikōāka! Mupure mu ōārō irirosũta murādere ōārō būremurĩ merā wereka! Mu pagupũrārē mu ōārō irirosũta maamarādere būremurĩ merā wereka! ²Mupore mu ōārō irirosũta murā nomedere ōārō būremurĩ merā wereka! Mu pagupũrā nomerē mu ōārō irirosũta nōmedere ñerō ūaribejaro marĩrō ōārō būremurĩ merā wereka!

³Wapiweyarā nome iritamusũña marĩrārē iritamuka! ⁴Wapiweyo pũrākũdeo āārĩmakū, parāmerākũdeo

äärimaküdere igüsä igore iritamuburo, igo igüsärë masüdea waja. Irasü iritamurä, Marîpu igüsäyarärë iritamudorederosüta irirä yäma. Igüsä irasiriri merä Marîpure usuyari merä iämakü yäma. ⁵Bopogo wapiweyo igoyarä marîgö: “Marîpu yure iritamugukumi”, äri günamo. Irasirigo umurî, ñamirî Marîpure: “Iritamuka yure!” äri sërëñkõämo. ⁶Gajego wapiweyo igo gäämerî direta irimoämagö, okago äärîkerego, boadeo irirosü Marîpu gäämerîrë irimasibeo äärîmo. ⁷Iri äärîpereri wapiweyarä nomerë iritamurîmarë yu murë gojarire Jesúre bûremurärë wereka, gajerä igüsärë: “Ñerö yäma, igüsäyarärë iritamubema”, äri werewuabirikõäburo, äri gü! ⁸Sugu igüyarärë, igüya wii marädere öärö korebi: “Jesúre bûremubea”, äri gü irirosü yämi. Jesúre bûremerä nemorö ñerö irigü äärîmi.

⁹Wapiweyarä nomerë iritamuburi dupuyuro, papera pügie äsü äärîrâ nomerë gojatúka! Búro, sesenta bojori nemorö opago, sugüreta marâpuküdeö äärîburo. ¹⁰Masaka: “Igo öärîrë irigo äärîmo”, ärisügö, igo pürärë öärö masüdeo, igoya wiire gämeñajärä ejarärë öärö bokatîrîñeägö, moäboego irirosü Jesúre bûremurärë iritamugö, ñerö tarirärë iritamugö, äärîpererärë bopoñarî merä iägö, gajino öärîrë irinîgö äärîburo.

¹¹Wapiweyarä nome, nóomeweya nome äärîmakü, i papera pügie gojatúbirikõäka! Igüsä Cristoyare iridüaro nemorö üma merä äärîduarä, dupaturi marâpuküduabokuma. ¹²Irasü igüsä dupaturi marâpukürä, igüsä: “Marâpu marîgö, Cristoya direta irigokoa”, ärideare iribiribokuma. Irire iribirideä waja, waja opabokuma. ¹³Igüsä dupaturi marâpukümerä, térikurä, gajeräya wiirigie gämeñajägorenarä, gajerärë ñerî kerere werenîrâ, gajerärë igüsäyamarë sërëñarikurä, gajerä igüsärë weredobirideareta masakare weregorenarä dujabokuma. ¹⁴Irasirigü:

“Igüsärë, gajerä wapiweyarä nome murärë iritamurösü iritamubirikõärö gäämea”, äri werea. Dupaturi marâpuku, püräkuburo doja. Igüsäya wii marärë öärö koburo. Igüsä irasirimakü, ñegü marirë iäturigü masakare igüsärë: “Ñerirë irirä yäma”, äri werewuamakü iribiribokumi. ¹⁵Suräyeri wapiweyarä nome Cristoyare pirikõä, wätëa opu Satanäya gapure irituyasiama.

¹⁶Jesúre bûremurä, igüsäyarä wapiweyarä nome äärîmakü igüsärë iritamuburo. Jesúre bûremurî bumaräguere igüsärë iritamudobirikõäburo. Irasirirä Jesúre bûremurî bumarä gajerä wapiweyarä nome iritamuña marîrâ gapure iritamumasîma.

¹⁷Jesúre bûremurä oparä murä igüsäyarärë öärö dorerärë gajerärë bûremurö nemorö bûremurö gäämea. Igüsä öärö moärî waja öärö wajariburo. Suräyeri Marîpuyare wererä, igüsäyarärë buerä äärîma. ¹⁸Marîpuya werenîrî gojadue pügie, sugü moägärë marî wajaribure äsü äri gojasüdero äärîbä: “Weku trigo yeri gasirire igüya guburi merä kura koro, trigore baaduagu baaburo. Igüya disi túsarî berore túsäbirikõäka!” äri gojasüdero äärîbä. Gajero äsü äri gojasüdero äärîbä: “Moägürë igü moärî wajare wajariro gäämea”.

¹⁹Sugüta Jesúre bûremurä opure: “Ñerirë iriami”, äri werewuamakü pébirikõäka! Përä o urerä igü irideare iänerä igürë werewuarire péka! ²⁰Jesúre bûremurä nererögue äärîpererä péurogue ñerö irigure: “Irire neö irinemobirikõäka!” äri wereka, gajerä güirä, igü irirosü iribirikõäburo, äri gü!

²¹Yu, Marîpu iürö, Jesucristo iürö, irasü äärîmakü Marîpure wereboerä igü beyenerä iüröguedere murë äsü äri weregura. Yu murë dorerire irigü, äärîpererä Jesúre bûremurärë bûremurî merä sürosü iäka! Musä suräyeri igüsärë öärö irirosü, gajerä igüsä watope marädere sürosü öärö irika! ²²Gajerärë Jesúre bûremurä

oparā āārīmurārē muya mojóri merā ñapeo, ígūsārē sóoburi dupuyuro ígūsā āārīrikurire oārō íāp̄urorika! Ñerīrē irirārē sóogu, ígūsā irirosūta mude ñerō irigu āārībokoa. Āārīpereri ñerīrē iribita āārīrikuka!

²³Mu paru pūrīrī opagu āārā. Irasirigu irire kúkugu, deko direta iiribirikōāka! Mérōgā igui deko pāmudeadere iirika!

²⁴Mu Jesúre bñremurā oparā āārīmurārē ígūsā āārīrikurire íāgū, ire oārō masika! Marīpu ñerārē wajamoāburi dupuyuro surāyeri masaka ígūsā ñerīrē iririre marī íāmasīa. Gajerā gapure ígūsā ñerī iririre íāmasībea. Marīpu āārīpererā ñerārē wajamoārīnu āārīmakū, ígūsā ñerī irideare masīrākoa. ²⁵Irasūta masaka ígūsā oārī iririre íāmasīsua. Gajerā ígūsā oārīrē iririre daporare íāmasībirikererā, p̄rugue masīrākoa.

6 ¹Moārīmasā Jesúre bñremurā ígūsā oparā dorerire gopeyari merā iriburo. Ígūsā irasirimakū íārā, gajerā Marīp̄ure, marī bueridere ñerō ārī werenībirikumā. ²Ígūsā oparā Jesúre bñremurā āārīmakū: “Ígūsā guare dorebirikōārō gāamea”, ārī gūñabirikōāburo. Irasū gūñarōno irirā ígūsā dorerire bñremurī merā iriburo. “Marī oparā Jesúre bñremurā āārīmakū, ígūsārē maia, irasirirā ígūsārē oārō moāboerākoa”, ārī gūñaburo. I yu were gojarire Jesúre bñremurārē bueka!

Marīp̄ure bñremurīmarē, oārō āārīrikurimadere gojadea

³Masakare ārīgatori merā buerā marī Op̄u Jesucristoya diayema āārīrīrē buedeare bñremubema. Marīp̄uyare marī bñremurīrē gāamemerā āārīma. ⁴“Gajerā nemorō masīa”, ārī gūñakererā, diayemarē neō masībema. Pēmasīmerā irirosū masaka werenīrīrē gāme guaseoduarā āārīma. Irasirirā gajerārē gāme íāturi, gāme íāduabiri, ñerō kere gāme ārī were, ñerō gāme gūñamakū yāma. ⁵Diaye gūñamerārē gāme guaseonīmakū yāma. Ígūsā diayema āārīrīrē masīmerā āārīmakū, ígūsārē:

“Marīp̄uyare irituyarā, wáro niyerure wajatarākoa”, ārī gūñamakū yāma. Ígūsānorē wapikubirikōāka! ⁶Marī, Marīp̄uyare bñremurīrē oārō irituyarā, wári oārī oparā irirosū āārā. I merā usuyāa. ⁷Marī i ūm̄guere deyoarā, neō gajino merā deyoabirib̄u. Boarāde neō gajinorē āiābirikoa. ⁸Irasirirā surī, baarī marī dapora oparī merāta usuyaro gāamea. ⁹Gajerā gapu wári opaduasiā, ígūsā ñerī iriduare pirimerā, pēmasīrī marīrō ñerīrē ūaribejarē dujama. Irasirirā iri merā ígūsā basita poyanorēsīā, peamegue bēosūrākuma. ¹⁰Niyeru maīrī, masakare āārīpereri ñerīrē irinūgāmakū iriri āārā. Surāyeri niyerure bñro gāamerā, Jesúyare bñremuadideare piri, ígūsā basita bñro bujawereri bokama.

Pablo Timoteore: “Mu Jesúre bñremurīrē neō piribirikōāka!” ārī gojadea

¹¹Mu tamerā Marīp̄uyagu i āārīpereri ñerīrē ūaribejabirikōāka! Diayema irigu, Marīpu gāamerīrē irigu, ígūyare: “Diaye āārā”, ārī bñremugū, gajerārē maīgū, ñerō tarikeregu gūñaturari merā Marīp̄uyare irigu, “Gajerā nemorō āārā”, ārī gūñarō marīrō ígūsārē iritamugū āārīka! ¹²Marīpu murē siuidi āārīmī, ígū p̄uro perebiri okari opaburo, ārīgū. Irasirigu Jesucristore mu bñremurīrē wārā masaka péurogue werebu. Iri okarire opabu, ñerō tarikeregu, ígūrē bñremurīrē piribirikōāka! ¹³Yu, Marīpu āārīpererārē okari sígū íūrō, Jesucristo ígūyamarē Poncio Pilatore diaye weredi íūrō ire murē iridorea. ¹⁴Jesucristo i ūm̄guere dupaturi aarimakūguedere ñerī marīgū, masaka werewuasūña marīgū ígū doredeare gorawayuro marīrō irinīkōāka! ¹⁵Marīpu ígū: “Āsū irigura”, ārīdeare iririnu ejamakū, Jesucristore dupaturi iriugūkumi. Ígū suguta oātariḡu, turagu, āārīpererā oparā nemorō Op̄u, āārīpererā dorerā nemorō Doregu āārīmi. ¹⁶Ígū suguta neō boabi āārīmi. Boyorogue neō sugu masakū ejamasīberogue āārīmi. Neō

sugu masaku ìgùrê ìádi, ìgùrê ìägùde mámi. Irasirirã neò piriro marĩrõ ããrĩpererinurĩ ìgùrê: “Turataria mũ”, ãrĩ buremurã! Irasũta irirã!

¹⁷I ãmũmarê wári oparãrê ãsũ ãrĩ wereka: “ ‘Gajerã nemorõ ããrã’, neò ãrĩ gũñabirikõãka! Mũsã opari pereakõãrokoa. Irasirirã: ‘Yũ wári opari merã õãrõ ããrĩgukoa’, ãrĩ gũñabirikõãka! ‘Marĩpũ yũre sĩrĩ merã õãrõ ããrĩgukoa’, ãrĩ gũñaka!” ãrĩka ìgũsãrê! Marĩpũ marĩrê ããrĩpereri marĩ oparire sĩmi, iri merã usuyaburo, ãrĩgũ. ¹⁸Wári oparã õãrĩrê iriburo. ìgũsã wári opari merã opamerãrê iritamuburo. ìgũsãrê iritamurã, ìgũsã oparire õãrõ merã sĩburo. ¹⁹ìgũsã irasirirã, wári ãmũgasimarê opasiarãkuma. Irogue ããrĩrĩ neò perebirikoa. Irasirirã

irogue Marĩpũ merã perebiri okari opanfõãrãkuma.

Pablo Timoteore doretũnudea

²⁰Timoteo, Marĩpũ mũrê weredoregũ pídeare piribirikõãka! Marĩpũre gããmemerã i ãmũma ubu ããrĩrĩ werenĩrĩrê, ìgũsã noó gããmerõ werenĩmoãmarĩdere pètũyabirikõãka! “Marĩ werenĩrĩ, masĩrĩmasã werenĩrĩ ããrã”, ãrĩkererã, Marĩpũyare masĩrã irirosũ werenĩrã meta yãma. ²¹Surãyeri ìgũsã werenĩrĩrê pètũyarã, Marĩpũyare ìgũsã buremuadideare pirinokõãma.

Marĩpũ mũrê õãrõ iritamuburo.

Irasũta iriburo.

Iropãta ããrã.

Pablo